

EDITORIAL

Gyera sa disimpormasyon sa US aron itukmod ang Pilipinas sa gyera


Klaro kaayo nga dili higala sa katawhang Pilipino ang imperyalismong US. Kini walay duda nga gipamatud-an sa pagtarget sa militar sa US sa mga Pilipino sa nabutyag nga sekretong kampanya sa disimpormasyon niini atol sa pandemyang Covid-19. Dautang laraw kaniadto sa US nga hiloan ang hunahuna sa mga Pilipino sa sayop nga impormasyon kalabot sa bakunang Sinovac gikan China, pagawasong dili kini luwas o epektibo, aron paburan ang mga bakunang hinimo sa US sama sa Pfizer ug Moderna. Ang maong pagpakaylap sa US sa disimpormasyon grabeng nagpeligro sa pangpublikong panglawas sa Pilipinas, ug gituuhang hinungdan sa langan nga pagpamakuna sa nasud.

Ang maong kampanya sa disimpormasyon gipasiugdahan ug gipondahan sa Pentagon o Department of Defense sa US. Nagsgod kini ilalum sa kanhing gubyernong Trump, ug nagpadayon hangtud sa unang mga bulan sa kasamtangang gubyernong Biden. Dakung pondo ang gibubo sa US alang sa pagdeploy og mga sundalo ug uban pang personel aron maghimo ug magdumala og gatusan ka mga pekeng account sa social media aron impluwensyahan ang mga Pilipino sa islogang "China ang virus."

Ang maong kampanya sa disimpormasyon gilunsad sa militar sa US subay sa linya sa "aktibong kombatan," usa ka doktrinang gipatunhay karon sa US sa pakigkompetisya ug pakiglantugi sa mga imperyalistang karibal niining China ug Russia. Ginagamit sa US ang mga pwersang militar niini sa "aktibong kombatan" bisan walay gakahitabong direktang armadong panagbangi. Gihimo kini dungan ang mga lakang sa pagpamig-ot sa ekonomiya (sama sa mga sangsyon o pagpig-ot sa pagpamu-

hunan ug pamatigayon), lakip na ang aktibong paggamit sa pwersang militar aron kontrahon ang nagkalapad nga kusog ug impluwensya sa mga karibal niini.

Ang maong kampanya sa disimpormasyon o gyera sa impormasyon padayon nga ginahimo karon sa imperyalismong US sa Pilipinas. Target niini ang hunahuna sa mga Pilipino aron ilhong "higala, kaabag ug kaalyado" nila ang US, ug "kaaway" ang China. Kakunsabo ang mga itoy niini sa gubyernong Marcos, lakip na ang pipila ka senador ug kongresista, ug mga bayaran o naimpluwensyahanang institusyon ug tawotawo sa



burges nga masmidya, ginahulma ang hunahuna sa mga Pilipino aron mahimong maanyag kanila ang presensya ug pagdomina sa mga sundalong Amerikano sulod ug palibot sa nasud.

Subling ginapakusog ang hiwi nga pagtoong "big brother" o "magulang" ang US nga "manalipud" sa "makaluluoy" nga Pilipino, sukwahi sa kamatuurang duha ka beses nang gigubat sa imperyalismong US ang Pilipinas aron ilugon ang kagawasang naangkon sa rebolusyonaryong pagsukol sa mga Pilipino, una batok sa kolonyalismong Espanya, ug ikaduha, batok sa pagpanakop sa Japan. Ginapagawas karon nga ilalum sa Mutual Defense Treaty, "pagatabangan" sa US ang Pilipinas batok sa China, bisan og ang tinuod, dili molihok ang US nga dili unahon ang iyang kaugalingong interes. Ginagamit sa US ang mga kasabutang militar niini sa Pilipinas aron magamit ang nasud nga daku niining base militar aron ilunsad ang pagpanghulhog niini og gyera sa China.

Ginasugnuran karon sa US ug rehimeng Marcos ang Sinophobia o ang isterya, duda, kahadlok o kasuko sa China ug tanang Chinese sa Pilipinas. Bisan walay kongkretong

ebidensya, ginapakaylap ang mga ispekulasyon kalabot sa mga espiyang Chinese, impiltrasyon ug mga sikretong grupo sa mga sundalong Chinese sa Pilipinas. Mismong si Marcos ang numero unong promotor niini sa pipila ka beses na niyang pagpasumbingay nga usa ka dakung "panggawas nga hulga" ang China sa Pilipinas, tungod kuno sa mga away sa dagat. Samtang ginahimo ang istorya sa "planong pagsulong sa China," naghari-hari ang mga pwersang militar sa US ug gawasang ginagamit ang kayutaan, kahanginan ug kadagatan sa Pilipinas sa pagbansay ug pag-andam sa gyera.

Kakunsabo ang US, subli-subli ang AFP ug Philippine Coast Guard sa pagsulay nga magdala og mga gamit sa konstruksyon sa mga "supply mission" niini sa Ayungin Shoal, nga sayod silang mahagit ang China tungod kay lapas kini sa kanhing mga kasabutan tali niini ug sa Pilipinas. Matngong ginababagan sa US ug sa rehimeng Marcos ang dayalogo o negosasyon nga maoy hustong dalan aron malinawong sulbaron ang bangi sa kadagatan. Sa walay hunong nga pagpanghagit sa rehimeng US-Marcos, nahimong agre-



sibo ug bangis ang China sa pagtratar niini sa Pilipinas ug sa dili niini pag-ila sa mga katungod sa Pilipinas nga giila sa internasyunal nga hukmanan niadtong 2016.

Walay hunong, walay puas ug walay kinutuban ang pondong gibubu sa imperyalismong US sa tanang natad sa gubat sa impormasyon, aron itanum ang pagkaulipon ug pagkamaluibon sa alimpatakan sa mga Pilipino. Adlaw-adlaw nga madungog ang tingog sa imperyalismong US nga namulong sa lain-lain porma ug dagway sa social media, sa mga balita, sa mismong baba ni Marcos ug mga upisyal sa iyang gubyerno.

Dautang laraw sa imperyalismong US nga palungon ang nagdilaab nga patriyotismo sa kasingkasing sa katawhang Pilipino, ug ipadawat sa katawhan nga sila malipayong mga pinireso sa semikolonyal nga paghari niini sa Pilipinas. Gusto nilang mouyon ang katawhan sa ginahimong pagyatak sa soberanya sa Pilipinas ug paggamit sa nasud isip instrumento sa pagpanghagit sa US og gyera sa China. Laraw nilang ipiyong sa mga Pilipino ang ilang mga mata sa tin-aw nga kamatuuran nga ang nasud karon instrumento sa estratehiyang heypulitikal sa US, nga adunay laraw nga ipahamtang ang hegemonya sa lain-lain bahin sa kalibutan ug ligsan ang kinsamang nasud o pwersa nga mobabag.

Kinahanglang magmabinantayon, ibutyag ug isalikway sa katawhang Pilipino ang gyera sa disimpormasyon sa imperyalismong US ug itoy nga rehimeng Marcos aron kontrolon o impluwensyahan ang ilang panghunahuna, sikolohiya ug emosyon. Walay laing mas epektibong pamaagi kundili ang ipatuman ang kalihukang pagtuon sa kasaysayan, dili sa punto de bistang burges ug maki-US, kundili sa panglantaw sa masang nakigbisog, aron pukawon ug padilaabon ang diwang makinasudnon sa katawhan, sa ilang pagbaktas sa dalan sa pakigbisog alang sa tinuod nga nasudnong kagawasan.

AB

 <p>Bolyum LV Ihap 12 Hunyo 21, 2024</p> <hr/> <p>Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p>	<h2 style="text-decoration: underline;">Unod</h2> <p>Editorial: Gyera sa disimpormasyon sa US aron itukmod ang Pilipinas sa gyera 1</p> <p>Mga sundalo, giisnays sa BHB 3</p> <p>Pagbuto sa Bulkang Kanlaon, gitubag sa BHB 3</p> <p>Adlaw sa mini nga kagawasan, gidumdum 3</p> <p>Hulga sa kagawasan sa Pilipinas ang US 3</p> <p>Dili mahubas ang suporta sa masa 4</p> <p>Kalihukang pagtul-id sa Negros 5</p> <p>Magkabalag, apan magkauban pa gihapon 6</p> <p>Sa mubong pagkasulti 7</p> <p>Pag-antus sa kalbaryong dala sa El Niño 8</p> <p>Hacienda Roxas: Kadunot sa CARP 9</p> <p>Protestang mag-uuma sa ika-36 tuig sa CARP 9</p> <p>16-anyos nga estudyante, gipatay 10</p> <p>Mga protesta 10</p>
<p style="text-align: center;">Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas</p>	
<p style="text-align: center;"> ang.bayan@cpp.ph</p>	

Mga sundalo, giisnaysa sa BHB-Western Samar

GIISNAYP SA BAGONG Hukbong Bayan (BHB)-Western Samar (Arnulfo Ortiz Command) ang mga sundalo sa 87th IB nga nagkampo sa Sityo San Pedro, Barangay Poblacion 3, San Jose de Buan, Samar niadtong Hunyo 9. Nagtaud og koral sulod sa sityo ang mga sundalo alang sa pagtukuron nilang detatsment dinhi.

Napatay sa isnayp si Corporal Marvin Calvintos. Gipaulanan og bala sa mga Pulang manggugubat ang mga sundalo nga nagresulta sa pagkasamad sa daghan kanila.

Isip balos, gipahimungtan sa mga sundalo ang mga sibilyang komunidad. Gikanyon nila ang mga bukid ug umahan duul sa sityo nga nagresulta og kahadlok sa mga mag-uuma. Mayorya sa mga mag-uuma ang wala nakatungha sa ilang kaingin. Ang uban natukmod nga magbakwit sa kahadlok nga maigo sa mga bomba.

Militarisado na ang San Pedro sugod pa lang sa tuig 2024. Nataho dinhi ang patung-patung nga mga paglapas sa tawhanong katungod.

Pagbuto sa Bulkang Kanlaon, giatubang sa BHB-Negros

MIRESPONDE KARON ANG mga yunit ug kumand ilalum sa Bagong Hukbong Bayan (BHB)-Negros Island (Apolinario Gatmaitan Command) aron moabag ug motabang sa masang Negrosanon nga apektado sa pagbuto sa Bulkang Kanlaon. Mibuto ang bulkan niadtong Hunyo 3 ug nakasinati og pagbaha sa lahar gikan sa bulkan ang mga komunidad sa Central Negros niadtong Hunyo 6 bunga sa kusog nga pagbundak sa ulan nga misagol sa abo nga gibuga sa bulkan.

Dobleng paantus sa masang Negrosanon ang pagbuto sa Bulkang Kanlaon tungod kay wala pa sila nakabarog gikan sa dakung kadaut sa hulaw niadtong panahon sa El Niño.

Sa mga taho, mikabat na sa 15,511 pamilya (halos 50,000 katawo) sa 23 ka barangay ang apektado sa pagbuto sa bulkan niadtong Hunyo 18. Gibanabanang mokabat sa ₱10 milyon na ang kadaut nga gibunga niini sa sektor sa agrikultura.

Imbes nga kongkreto ug lehitimong tabang, nagpakitang-gilas lang ang rehimeng Marcos Jr sa pagpanghatad niini og dili sustenableng ayuda alang sa pagpamulitika niini ug propagandang militar. Taliwala sa katalagman, gideklara pa sa 303rd IBde nga dili niini ihunong ang mga operasyong kombat sa mga apektadong komunidad. Sa pipila ka higayon, gigamit pa sa mga sundalo ang pagpanghatag og ayuda aron pugos nga "pasurenderon" ang mga sibilyan.

Adlaw sa mini nga kagawasan, gidumdum sa mga rali

NAGPROTESTA ANG MGA grupong nasudnon-demokratiko sa sulod ug gawas sa nasud aron kundenahon ang nagpadayon nga neokolonyal nga paghari sa imperyalismong US sa nasud niadtong Hunyo 12, adlaw sa mini nga kagawasan sa nasud.

Nagmartsa sila padulong sa embahada sa US sa Roxas Boulevard ug nanawagan sa katawhang Pilipino nga ibutyag ug babagan ang imperyalismong US ug ipakigbisog ang tinuod nga kagawasan ug demokrasya sa Pilipinas.

Samtang, nagkaraban ang mga demokratikong organisasyon sa Southern Tagalog sa mga lungsod sa Cavite, lakip sa Kawit kung asa gideklara ang mini nga kagawasan sa Pilipinas. Sa Cebu City, naghimo usab og demonstrasyon sa Colon Street.

Lain-laing aktibidad ug protesta usab ang gilunsad sa San Francisco ug Los Angeles sa California, sa Washington, Chicago ug Oregon sa US.

Samtang, nagpagula og pamahayag ang mga balangay sa National Democratic Front of the Philippines gikan sa lain-laing rehiyon ug ang mga alyadong organisasyon niini kalabot sa adlaw sa mini nga kagawasan. Matud nila, ang pagkab-ot sa tinuod nga kagawasan sa nasud Pilipinas mahitabo lamang sa kadaugan sa demokratikong rebolusyon sa katawhan.

Hulga sa kagawasan sa Pilipinas ang mga base militar ug war games sa US

SA MGA KOMUNIDAD palibot sa mga base militar sa US, o giilang "EDCA site" ug mga gilunsaran sa Balikatan 2024, kaylap ang kawalay pagtagad, disimpormasyon ug pagpamig-ot sa reaksyunaryong gubyrno ug militar sa US. Kini ang kongklusyon sa usa ka *fact-finding mission* nga gihimo sa Bayan-USA ug PINAS Peace *mission* sa Central Luzon, Ilocos Norte ug Marawi City. Gipubliko nila niadtong Hunyo 12 ang resulta sa 3-ka-semanang imbestigasyon.

Lakip sa mga nakaplagan sa delegasyon ang paghan-ok sa US sa gidudahang gamit-militar gawas sa gitakdang mga "EDCA site" ug pagpahimulos sa mga sundalong Amerikano sa mga rekurso sa masang Cagayanon; pagkunsabuhay sa mga pribadong kumpanya ug militar; walay pagpahimangno sa mga komunidad sa Ilocos ug Cagayan kung asa gilunsad ang Balikatan nga nagbunga og troma ug kalisang sa sibilyang populasyon; ug militarisasyon, pagpamig-ot ug *Red-tagging* sa mga komunidad nga nanalipud lamang sa ilang panginabuhian. Sa Marawi City, gipaambit sa mga lokal nga upisyal ang disimpormasyon kalabot sa ginatukod nga base militar ug "economic zone" duul sa "ground zero" gamit ang pondo sa EDCA.

Matud sa delegasyon, kining tanan hulga sa kagawasan sa mga Pilipino, ug angayang panubagon ang rehimeng Marcos, ingonman ang gubyrno sa US ilalum ni Joseph Biden sa kadaut sa dala niining militarismo sa pinakakabus nga sektor.

Wala sukad mihubas ang suporta sa rebolusyon sa masa sa Samar

Pipila man ka henerasyon ang milabay, wala sukad mihubas ang pagsuporta sa masang mag-uuma sa Western Samar sa Bagong Hukbong Bayan (BHB). Kini ang mensahe sa rebolusyonaryong masa sa prubinsya dihang nagkahigayon nga subling makasandurot ang BHB human ang pipila ka panahon nga pagkaputol sa linya.

"Gipadaku mi sa among mga ginikanan nga taas ang pagrespeto sa mga kauban," saysay ni Ka Amboy sa usa ka simple apan undanon nga pagsaulog sa ika-55 nga anibersaryo sa BHB niadtong Marso 29. Bisan og wala siya kaila sa kadaghanan sa bag-ong manggugubat nga miabot, wala siya nataha ug dali niyang nakasuud ang mga kauban. "Nahinumduman nako ang gisulti sa akong amahan, nga bisan asa mi makaabot ug makakita mi og NPA, ato na, tungod kay ang ilang ginapakigbisugan para sa sama natong kabus."

Kanunay ginapahinumduman ni Ka Amboy ang iyang mga silingan nga nakab-ot nila ang mga kadaugan sa panginabuhian ug mumhong hinabang gikan sa gubyrno tungod sa rebolusyonaryong kalihukan. Masaligon nilang gisulti nga daghan pa gihapon ang nagpangga, nagmahal ug nagsuporta sa BHB sa ilang baryo tungod dinhi.

Nagpasalamat usab ang usa pa ka mag-uuma sa mga manggugubat, nga kadaghanan mga batan-on. "Inyong gipadayon ang pakigbisog nga gikamatyan sa akong igsoon," saysay ni Ka Ambon. Namartir sa usa ka panagsangka ang iyang igsoon niadtong 1987. Gusto usab unta niyang magpultaym apan gagmay pa ang iyang mga anak kaniadto. "Karon, dili na pud nako kaya tungod kay tigulang na ko ug naa nay rayuma," matud niya. "Nagpasalamat ko kaninyo sa inyong pagpadayon. Dili man ko makauban sa inyo, binsa sa unsang oras nga kinahanglan ko ninyo, motabang ko ug ang akong

pamilya." Andam usab siyang suporta-han kung mosampa sa hukbong bayan ang kinsaman sa iyang mga apo.

Gipaabot sa tagabaryo ang ilang pasalamat sa pagtabang sa BHB sa ilang mga umahan. "Bisan wala mi didto, bisan wala mi kahibalo, padayon mi nin-yong ginatabangan sa umahan," matud ni Ka Huling. "Salamat gyud sa inyo. Sa tinuod lang, sa inyo nako nabati ang tinuud nga kalipay sa pag-alagad. Maong malipayon kaayo ko kung kauban mo. Gimahal namo kamo."

Paambit sa masa, hapit na silang napatoo sa militar nga wala nay hukbong bayan sa ilang lugar tungod sa dugay-dugay nga panahong wala sila naadtuan sa yunit sa BHB. "Maong dihang among nabali-taan nga adunay mga kauban, nadasig mi," saysay ni Ka Bining, usa sa mga misalmot sa panagtapok. Apan saysay niya, nag-amping usab sila basin mga nagpakunokuno lamang nga mga bag-ong salta nga Pulang manggugubat. Nakampante ra siya human mahimamat ang mga manggugubat.

"Husto ko nga dili kanus-a man pwedeng mawala ang NPA hangtud dili pa kita modaug," matud niya.

Iyang gisaysay nga wala niya kanus-a man giluiban ang mga kauban. "Wala ko nagbag-o, bisan og nagdugay dinhi ang kaaway, wala ko nagsurender," matud niya. "Ang akong nahibaloan, sa ako lang, hangtud karon nagpabilin kining



sikreto."

Gawas sa mahinuklugong mga estorya, naghalad og kanta ug uban pang kulturahong pasundayag ang masa, nga gikalipay kaayo ug nakapataas sa moral sa mga kauban. Nagpasalamat usab ang mga kauban sa madasigon ug mainitong pagdawat kanila sa mga residente ug ang pagsikreto sa ilang presensya ug lihoc sa mata sa militar. Samtang nagtapok-tapok ang masa ug hukbo sa maong lugar, dili moubos sa 40 ka kolum ang nag-operasyon sa mga barangay nga sakop sa mga lungsod sa San Jose de Buan, Gandara, San Jorge, Catbalogan, Motiong, Jiabong ug Paranas sa Samar ug sa mga baryo sa Can-avid ug Dolores sa Eastern Samar. Anaa sa 80 ka baryo ang nakapailalum sa mga operasyong RCSP.

Sa maong panagtapok, kolektibong gipalig-on sa mga Pulang kumander, manggugubat ug rebolusyonaryong masa ang ilang dedikasyon ug determinasyon nga iasidang ang rebolusyonaryong pakiggubat. Armado sa mga pagtuon sa miagi, determinado silang patigbabawan ang napunting nga mga kahuyangan ug himuon ang tanang panningkamot aron tubagon ang panawagang padilaabon ang armadong pakigbisog ug moabante nga adunay dugang kusog.

AB

Kalihukang pagtul-id sa Negros taliwala sa grabeng operasyong militar

Taliwala sa walay hunong nga terorismo ug pasistang pagpanumpo sa Negros, pурсigidong ginapatuman sa mga kadre ug myembro sa Partido sa isla ang panawagan sa Komite Sentral niadtong Disyembre 2023 nga ias-dang ang kalihukang pagtul-id.

Gigamit niining praktikal nga reperensya ang Rebolusyon, teoretikanhong mantalaan sa Partido Komunista ng Pilipinas, ug ang mga sinulat ni Jose Maria Sison sa mga panagtapok, tigum, asesment, pagtuki ug pagsumada sa mga magkalambigit nga rebolusyonaryong gimbuhaton sa tanang mga gerilyang nataran sa isla. Nahimong positibo ang resulta niini sa tibuok rebolusyonaryong kalihukan sa Negros. Napapaspas ang paghiusa sa pag-ila sa mga kahuyangan gikan sa kolektibong pagtuki sa praktikal nga mga hisgutanan ug rebolusyonaryong gimbuhaton, ilabina sa mga kahuyangan sa armadong pakigbisog nga nagresulta og negatibong epekto sa pangkinatibuk-ang pag-abante.

Sa unang kwarto sa 2024, gitun-an balik sa Partido sa Negros ang 22 ka tuig nga kumprehensibong pagsumada sa rebolusyonaryong kasinatian sa rehiyon sukad sa Ikaduhang Bantugang Kalihukang Pagtul-id hangtud 2016. Nahimong sumbanan kini alang sa kumprehensibong pagsumada sa Partido sa isla sa gimbuhatong ideolohiya, pulitika ug organisasyon sa tuig 2017-2022, ug aron ilhon ug tul-iron ang lain-laing porma sa kasaypanan ug kahuyangan.

Sa pagpatuman sa kalihukang pagtul-id, nagtudlo og mga responsableng kadre sa Partido aron ibwelo ang kalihukang pagtuon. Bisan atubangan sa grabeng atake sa kaaway sa mga baseng gerilya, padayon ang paglunsad og kolektibong pagtuon sa mga dokumento sa Partido sa una ug ikaduhang kalihukang pagtul-id. Labaw nga nahimong lagsik ang mga pagtuon sulod sa

mga yunit sa Bagong Hukbong Bayan hangtud sa lokal nga mga yunit sa Partido tungod sa aktibong partisipasyon sa mga magtutuon gikan sa batan-on ug tiguwang nga kadre ug myembro. Kolektibo nilang gitun-an ang pamahayag sa Komite Sentral ug Rehiyunal nga Komite sa Partido sa Isla sa Negros sa ika-55 nga anibersaryo sa Partido.

Gilunsad usab ang konsentradong pagtuon sa mga aktibista ug bag-ong rekrut sa BHB sa Batakang Kurso sa Partido. Sa pagtuon sa Imperyalismo, gihatagag duso ang kasamtangan krisis nga nagbunga sa kaylap nga gyera gikan sa pagpanulsol sa imperyalistang US sa mga kaalyadong nasud niini ilabina sa grabeng bangi sa US-China ug ang kongkretong epekto niini sa katawhang Pilipino. Gawas dinhi, gilunsad ang pag-ases sa usa ka tuig nga programa sa Partido sa matag natarang gerilya ug mga pagsaway ug pagsaway sa kaugalingon, samtang ginalunsad ang indibidwal nga pag-ases sulod sa BHB.

Matud ni Ka Marga, “sa pagrebolusyon, kinahanglang ang walay pagduhaduha sa pagtuon sa mga batakang prinsipyo ug walay kapuul nga pagtuki sa obhetibong kahimtang ug la-


baw sa tanan ang pagbrektru sa pagpakusog sa taktikal nga opensi-ba aron kumpiskahon ang mga armas gikan sa kaaway.”

Matud ni Ka Dayan, usa sa mga instruktur sa mga pagtuon, napatin-aw pa ang iyang kahibalo sa mga batakang prinsipyo sa Partido samtang naghatag og pagtuon. Samtang wala gidahum ni Ka Victor, usa sa mga edarang kadre sa Partido gikan sa IDKP, nga daw nagbalik-lantaw siya sa mga nahitabo sa kasaysayan sa Partido ug rebolusyon.

“Gihagit kita sa grabeng panahon ug kontradiksiyon. Dili mahadlok. Ang tinuod nga kagawasan dili lang damgo kundili makab-ot kini sa pagpukaw, pag-organisa ug pagpalihok sa masa aron magrebolusyon!” matud ni Ka Yan, usa sa mga batan-ong kadreng magtutuon.

Gimandoan sa Partido sa isla ang tanang yunit sa BHB nga magpursige sa gimbuhatong rekoberi, konsolidasyon ug pagpalapad. Kinahanglang abton ang mga lugar nga dugay nang wala nabalikan, ilabina na ang mga lugar nga wala pa naabot. Gimandoan usab ang mga komite sa Partido nga giyahan ang madasigong pag-asdang sa masa sa mga kontra-pyudal ug kontra-pasistang kampanya sa kabanikanhan ug isumpay ug ito ipatas sa ang-ang sa kontra-imperyalista ug kontra-pasistang kampanya sa kasyudaran aron kab-uton ang ilang mga demokratikong interes.

Labaw sa tanan, kinahanglang maglunsad og malampusong mga taktikal nga opensi-ba ug makakumpiska og mga armas sa pasistang kaaway gamit ang hustong taktika, teknika ug pamaagi sa gerilya pakiggubat.



Magkabalag, pero magkauban pa gihapon

Subling mitataw ang isyu sa diborsyo dihang giaprubahan sa ubos nga katiguman sa Kongreso ang pagbalaod niini sa Pilipinas. Lahi sa *annulment* ug ligal nga pagbulag, ang ligal nga opsyon sa diborsyo mao ang paglusaw sa kasal, pagbalik sa istatus nga “single” sa magtiayon ug pagtugot kanila nga magpakasal sa uban.

Nahimo nang balaod sa tanang nasud sa tibuok kalibutan ang diborsyo, gawas sa Pilipinas ug Vatican City. Lapad nga naila ang diborsyo isip katungod sa kababayan-an aron makabaton og hustisya, ilabina sa mga kaso sa kabangis sulod panimalay, kasal sa bata ug pinansyal nga pagpangulipon. Ginahatagan niini ang kababayan-an og ligal nga opsyon aron mobiya sa madaugdaugon ug malupigong mga kaminyoan, pagbaton og independensyang pinansyal ug hagiton ang patriyarkal nga kahimtang kung asa ginatrato silang pagpanag-iya sa ilang mga bana.

Bisan wala nakasulat sa balaod, ang pagbulag sa Pilipinas usa ka kasagarang reyalidad o obhetibong kahimtang sa han-ay sa katawhan. Kini tungod nagatunhay ang kadunot sa katilingban nga nagamugna sa mga kundisyon sa pagbulag sa magtiayon.

Hingpit nga huyang, kundili man kataw-anan, ang mga argumento batok sa diborsyo. Dili babag sa daghang nasud ang relihiyon aron ilhon ang panginahanglan sa pagbalaod dinhi aron giyahan ang mga

panagbulag ug siguruhon ang mga katungod ug kaayuhan sa tanang nalambigit.

Sulod sa rebolusyonayong kalihukan, giila ang diborsyo isip katungod ilalum sa mga lagda sa kasal. Langkub sa maong mga lagda ang mga relasyong lalaki ug babae, ug sa tali sa mga indibidwal nga adunay parehong-kasarian. Kini naggikan sa pag-ila sa diyalektikal nga materyalistang panglantaw nga nagabag-o ang mga butang, lakip ang relasyon sulod sa usa ka kasal. Pag-ila usab kini sa nagatunhay nga kamatuuran nga adunay madaugdaugon, dili patas ug abusadong mga kamiyosan, ingonman ang posibilidad nga mahanaw ang gugma ug pagsalig tali sa magtiayon.

Ginapabarog ug ginapalambo sa mga rebolusyonaryo ang relasyong manag-uyab ug magtiayon sa pundasyon sa *class love* (gugma sa hutong) ug *sex love* (gugma sa indibidwal). Ayha mosulod sa kasal, ginhangyo sa matag kauban nga hunahunaon ug seryosong pangandaman ang kinabuhi sa magtiayon ug rebolusyonayong pamilya. Kung mo-

sangpot sa diborsyo, ginapaagi kini sa proseso kung asa ginapresenta ngadto sa mga yunit ang petisyon aron lusawon ang kasal, ug kolektibo kining ginatuki ug ginadesisyonan.

Ginauyunan ang diborsyo sa mga kasong adunay pagluib o pagka lunud-patay nga kontra-rebolusyonaryo sa usa sa magtiayon; pagtraydor, bigamiya, o pagpangdagmal o paghulga sa kinabuhi sa kaparis; Kapakyasang ipatuman ang mga responsibilidad isip asawa o bana sulod sa lima ka tuig tungod sa pagkadakop sa kaaway o permanenteng pisikal nga kabilinggan (kung pagauyunan sa magtiayon); kung usa sa magtiayon ang kabubut-ong mihawa sa iyang katungdanan sulod sa duha ka tuig o nawala sa linya og lima ka tuig; kung ang magtiayon adunay personal nga di pagkasinabtanay nga nagbunga sa pagkaguba sa relasyon, ug ang relasyon nahimong pabug-at na sa magtiayon ug sa gimbuhaton nila sa Partido.

Sa mga kaso sa bug-at nga kalapasan, sama sa grabeng pagluib sa asawa, pag-minyo og duha, kabangis o paghulga sa kinabuhi sa kaparis, ginapahamtang sa Partido ang bug-at nga silot, lakip ang pagpalagpot sa sad-an sa organisasyon.

Ginasiguro sa mga kolektiba sa magtiayong nagdiborsyo nga mahatagan ang ilang mga anak og suportang moral, emosyunal, sikolohikal ug pinansyal—sigon sa nagatunhay nga mga palisiya.

Isip mga rebolusyonaryo, ginhuptan sa mga magtiayong nagbulag ang gugma sa hutong bisan lusaw na ang gugma tali nila. Nagabarog silang mga modelo samtang nagpadayon sa paglihok ug paghupot sa ilang mga tahas sa Partido ug rebolusyon. Ang mga nakapailalum sa aksyong pangdisiplina giniyahan sa Partido aron manglimbasog nga magtul-id ug magremolda sa kaugalingon.



18% o 2 milyong mga batang Pilipino, edad 5-paubos,



ang "grabeng naglisud sa pagkaon" o nakaon lamang sa duha gikan sa walo ka klase sa pagkaon nga gikinahanglan aron modaku sila nga himsog.

Bagsak (5)

ang grado sa Pilipinas sa pagpanalipud sa mga katungod sa mamumuo

Sa ikawalong tuig, nagpabilin kining usa sa 10 ka pinakadunot nga lugar para sa mga mamumuo.

Gikan sa: *Global Rights Index 2024, International Trade Union Confederation*

86%

sa mga Pilipinong "knowledge worker" (mga mamumuo sa IT, akademya, syentista, inhinyero ug uban pang propesyunal) ay migamit og AI (*artificial intelligence*), mas taas kaysa sa internasyunal na abereyds nga 75%.

Gikan sa: *2024 Work Trend Index*

proyektong pang-enerhiya sa hangin (*wind energy*) ang giaprubahan sa lokal nga gubyerno sa Camarines Sur, lakip ang pagtukod sa P163-milyong *offshore wind farm* sa San Miguel Bay nga 100% gipanyag-iyahan sa kumpanyang Danish.

Maapektuhan sa maong mga proyekto ang panginabuhian sa liboang mangingisda.

₱23 BILYON

kinahanglan para tapuson ang ginatukod nga bag-ong bilding sa Senado sa Taguig City. Sobrang miburot ang gasto gikan sa inisyal nga P8.9 bilyon nga balor sa proyekto.

134

proyekto sa magun-ubong mina nga nagalang kub sa 59,000 ektarya sa yutang kabilin ug kalasangan ang giaprubahan sa rehimeng Marcos o gihatagan og permit nga magpadayon sa operasyon.

16

8,500

rehistradong mangingisda ug 2,000 ka indibidwal ang mawad-an og panginabuhian sa planong pagbutang og 2,000-ektaryang *solar project* sa Laguna Lake.



UJOS 2024

Abli nang modawat og mga kontribusyong obra ug arte! Ipadala ang inyong mga hinimo sa ulos2024@proton.me.

Gipas-an sa anakpawis ang kalbaryong dala sa El Niño ug pagbag-o sa klima

Nahuman na ang El Niño ug misulod na ang ting-ulan, apan padayon pa gihapon ginaabaga sa masang naghago, ilabina sa mga mag-uuma ug mangingisda, ang kalbaryo sa pagkadaut sa ilang panginabuhian sa hulaw nga gipagrabe sa pagbag-o sa klima. Kulang kaayo ug pulos pasundayag lamang nahimong tubag sa rehimeng Marcos sa halos usa ka tuig nga pag-igo niini.

Sa pinakaulahing konserbati-bong datos sa Department of Agriculture, dili moubos sa ₱9.89 bilyon ang kinatibuk-ang kantidad sa kada-ut sa sektor sa agrikultura kung asa ₱57.72 milyon ang sa pangisda. Sa kinatibuk-an, mikabat sa 1.5 milyong pamilya ang naapektuhan sa malukpanong hulaw nga miigo sa 7,184 barangay sa 15 rehiyon. Sa grabeng kadaut, gipailalum sa *state of calamity* ang 432 ka syudad ug lungsod.

Kadaut sa Ilocos

Gikan 2020 nagkadaku na ang paghagba sa ani ug kita sa mga mag-uuma sa Ilocos tungod sa kakulang sa irigasyon, makanunayong pagsaka sa gasto sa produksyon, dili haum nga binhing humay nga *high-yielding variety*, mga kalamidad ug dangan, ug kawalay subsidyo gikan sa guberno. Gipagrabe sa hulaw ang maong mga problema.

Nagsalig sa ulan ang kadaghanan sa mga umahan sa rehiyon. Tungod sa hulaw, mikunhod ang ani sa mga mag-uuma og 50% hangtud 80%. Lapad nga umahan ang wala na natamnan sa *second crop* sa humay (ikaduhang tingtanum sa tuig), ug wala na natamnan sa mga tanum nga pangting-init sama sa *watermelon* ug sibuyas.

Mikunhod ang ani sa mais og hangtud 50% (gikan 4-5 tonelada ngadto sa 2-3.5 tonelada kada ektarya) tungod sa pagsusut ug sobrang pagkauga niini. Daku usab ang kadaut ug pag-ubos

sa kalidad sa tabako. Sa nakuhang datos sa 49 ka mag-uuma sa lima ka barangay pa lang nga nagatahum og humay, mikabat sa 12.31 ektarya o 67% sa ilang umahan ang naigo sa hulaw ug nawad-an sila og ₱644,645 kita.

Sa mga mangingisda, mikabat sa 99% ang gikunhod sa nasikop nga isda sa mga baybay. Gikan sa kanhing 500 kilo, usahay wala pa sa lima ka kilo ang ilang abot. Tungod dinhi, daghang mangingisda ang talagsa o wala nanagat tungod sa grabeng pagkalugi. Nahubas usab ang mga suba, sapa ug ekta-ektaryang mga *fishpond*.

Giabaga sa mga mag-uuma ang dugang gasto sa krudo, gasolina ug kuryente nga makanunayong nagamahal. Labaw nga mikusog ug misagunson ang pagbomba og tubig gamit ang krudo ug kuryente, gikan usa ka beses ngadto sa tulo kada semana. Mas daghan usab nga gasolina ang ginamit sa mga mangingisda

tungod kay kinahanglan pa nilang mopalayo aron makapangisda.

Uhaw ang nasinati sa daghang kabus nga masang Ilokano tungod sa paghubas sa mga tubod. Kadaghan sa komunidad ang walay maayo ug libreng serbisyo sa limpyo nga tubig mainum. Nag-antus sila sa pagsag-ob sa layo, sa hugaw nga atabay, ug sa pagkahubas sa tubig. Ang uban nagpalit na lang og mahal nga ₱60-₱80/drum sa tubig.

Korapsyon ug pasismo sa Cagayan

Mumho na gani, wala pa nakalumas gikan sa pagpangurakot ang pondong gigahin sa estado aron moabag sa kadaut sa El Niño. Sa Cagayan Valley, ang wala nagasto nga pondo alang sa bagyong Egay niadtong 2023 ang pundo nga gipanghatag sa mga mag-uuma ug mangingisda.

Palpak usab ang mga gipanghatag nga mga binhi tungod kay wala kini mitubo sa mala nga lupa. Nahimong problemado pa ang gipanghinambog nga mga *cash-for-work program* sa guberno. Gawas sa kulang kaayo ug pipila lamang ang “benepisaryo,” ulahi kaayo ang paghatag og kumpensasyon sa mga nakatagamtam niini. Salawayon usab ang dili pag-apruba sa Philippine Crop Insurance Corporation sa aplikasyon sa 9,000 ka mag-uumang para sa *insurance* sa ilang mga pananom.

Mas naggahin pa og pondo ug panahon ang rehimeng Marcos sa pagpagrabe sa gyera kontra-insurhensiya ug kampanya sa pagpanumpo sa rehiyon. Gigamit pa niini ug sa militar ang pagpanghatag og ayuda aron magpakaylap og bakak ug *psywar* sa katawhan. **AB**



Hacienda Roxas: Pruweba sa kadunot sa CARP

Pugos nga ginapatoo ni Ferdinand Marcos Jr nga nakapahimulos ang mga mag-uuma sa bogus nga Comprehensive Agrarian Reform Program (CARP) ilalum sa iyang rehimen. Sa miaging mga bulan, walag-too ang iyang paglibudlibud sa nasud alang sa pasundayag nga seremonya sa pagpanghatag og mga Certificates of Land Ownership Awards (CLOA). Ang tinuod, walay pulos ang maong mga pasundayag tungod kay nagpabiling kontrolado sa pipila ka agalong yutaan ang mga yutang agrikultural sa nasud.

Pagpamatuud niini ang kaso sa 7,000-ektaryang Hacienda Roxas sa Nasugbu, Batangas. Nabahin kini sa tulo ka parsela: ang Hacienda Palico, Hacienda Banilad, ug Hacienda Kaylaway nga milangkub sa lain-laining mga baryo.

Niadlong dekada 1980, mitumaw ang pakigbisog sa masa sa Hacienda Roxas nga gipasiugdahan sa mga mamumuo sa Central Azucarera de Don Pedro, mga mamumuong panguma, ug mga tenante

sa yuta sulod sa asyenda. Gitukod nila ang Damayan ng mga Manggagawang Bukid sa Asyenda Roxas-National Federation of Sugar Workers (DAMBA-NFSW) ug Katipunan ng mga Magbubukid sa Hacienda Roxas Inc. (KAMAHARI) aron pangulohan ang pakigbisog alang sa makatarunganong suhulan, tawhanong kondisyon sa pamuo ug uban pang katungod.

Human napalagpot ang diktaduryang Marcos Sr

ug gipulihan sa rehimeng Aquino I, gipailalum sa CARP ang 2,941 ektarya sa asyenda. Dihang mahatagan og CLOA ang mga mag-uuma niadtong 1988, gipahimuslan sa panagkunsabuhay sa Department of Agrarian Reform (DAR), Roxas and Company Inc (RCI), ug oportunistang kanhing lider sa DAMBA-NFSW nga si Roy Mahinay ug iyang asawang si Atty. Nenita Mahinay, nga kanhi mirepresenta sa mga mag-uuma, ang daghang depekto sa CARP aron pugngan ang pagpanghatag sa yuta.

Sikretong gibaligya sa magtiayong Mahinay ang pagsukol sa mga mag-uuma ug midapig sa agalong yutaang RCI. Human ang pipila ka dekadang mga saad, nagpagula og Consolidated Order ang DAR niadtong Disyembre 2023 kung asa nakasulat ang pag-atras kuno sa RCI ug mga mag-uuma sa tanang mga naunang petisyon. Sigon dinhi, isalig ang hisgutanan sa pagpanag-iya sa yuta sa korte. Ang tinuod, wala miuyon dinhi ang mga mag-uuma ug ang bugtong nagpakana dinhi mao si Atty. Mahinay, subay sa dikta sa agalong yutaang RCI.

Sa mando sa DAR, pagatumanon ang mini nga "50-50 win-win solution" nga girekomenda sa Korte Suprema subay sa hangyo sa RCI. Pagakanselahon ang naunang mga "mother CLOA" ug gimandoan ang liboang mag-uuma nga subling magsumite og mga papeles aron mahatagan sila og indibidwal nga mga CLOA.

Sa usa ka kumpas lamang sa mga agalong yutaan, dihadiha nga nabasura ang mga CLOA ug daling nailog ang yuta sa mga mag-uuma. Sa aktwal, walay nahitabong pagpanghatag og yuta sulod sa 36-ka-tuig nga pagtunhay sa CARP sa asyenda. Walay lain nabilin sa mga mag-uuma gawas sa usa ka papel ug dili ang hingpit nga pagpanag-iya sa yutang ilang giugmad. AB



Protesta sa mag-uuma sa ika-36 tuig sa CARP

NIADTONG HUNYO 10, nagpiket-protesta ang mga progresibong organisasyon sa mga mag-uuma, mangingisda ug tigpanalipud sa katungod sa yuta sa pagpanguna sa Kilusang Magbubukid ng Pilipinas atubangan sa DAR sa Quezon City dungan sa ika-36 ka tuig sa CARP. Gikundena nila ang kadunot sa pinakadugay, pinakagasto, ug pinakamalupigong "reperma sa yuta."

Misalmot sa protesta ang mga mag-uuma gikan sa Bulacan nga biktima sa bogus nga CARP. Pipila kanila naggikan sa mga lungsod sa San Mateo ug Norzagaray nga gipalayas sa ilang yutang giugmad niadtong 2018. Nakighiusa usab ang mga mag-uuma gikan sa San Jose del Monte City nga ginailugan og yuta sa mga agalong yutaan ug dagkung *developer* nga ginakumbert ang kapuslanan sa yutang agrikultural.

16-anyos nga estudyante, gipatay sa militar sa Sultan Kudarat

Gipusil patay sa 7th IB niadtong Hunyo 9 sa Sityo Kiling, Barangay Kiadsam, Sen. Ninoy Aquino, Sultan Kudarat ang 16-anyos nga estudyante nga si Eusibio Cranzo, naila usab isip Kuni Cuba. Pauli siya kauban ang iyang igsoon ug duha ka higala dihang mahitabo ang pagpatay.

Matud sa mga taho, nasugatan nilang Cranzo ang nag-operasyong yunit sa 7th IB dihang rakrakan sila. Dihadiha nga naigo si Cranzo, samtang nakadagan sa duul nga maisan ang tulo niyang kauban. Ginapagawas sa mga sundalo nga nakumpiska sa biktima ang usa ka ripleng Garand ug giakusahan siyang myembro sa Bagong Hukbong Bayan.

Samtang, nataho ang uban pang mga kaso sa paglapas sa tawhanong katungod sa milabayng mga semana.

Pagpamomba. Gibanabanang 2,700 ang apektado sa *aerial bombing* sa 54th IB ilalum sa 503rd IBde sa Barangay Maling, Balbalan, Kalinga niadtong Hunyo 7. Duha ka helikopter ang naobserbahan sa mga residente nga nag-alirong ug nanghulog og mga bomba.

Sa Nueva Vizcaya, walo ka beses nga gibomba sa 7th ID ang Barangay Abuyo, Alfonso Castañeda niadtong Hunyo 20 sa kaadlawon. Sunud-sunod usab ang pagpang-istraping sa AFP gamit ang duha ka *attack helicopter* inubanan sa mga *drone*.

Pag-aresto. Napulo ka adlaw nga gipriso si Edison Yu human giaresto sa mga pulis niadtong Hunyo 8 duul sa embahada sa Israel sa Bonifacio Global City sa Taguig City. Mosalmot unta si Yu sa protesta kontra henosidyo sa Israel dihang gidakop.

Sa Kalinga, giaresto sa 54th IB ang usa ka ginganlang Gap-idan Claver Bawit nga giakusahan niining manggugubat sa BHB sa Barangay Balantoy, Balbalan niadtong Hunyo 6.

Pagpamig-ot. Sa Bulacan, gireyd sa 80th IB ug pulis ang balay sa lider-pesante nga si Ronnie Manalo sa Barangay San Roque San Jose del Monte City niadtong Hunyo 18. Ginapagawas sa mga pulis nga nakuha sa balay ang mga armas, grana-da ug uban pang gamit bisan walay tawo dinhi. Sa parehong adlaw, giadtuan sa mga sundalo ang balay sa lider-pesanteng si Cecilia Rapiz sa Barangay Paradise 3 sa parehong syudad.

Sa Rizal, balik-balik nga gipig-ot sa mga sundalo ang 80-anyos nga lider-mangingisda nga si Romy Antazo. Niadtong Mayo, gikuha siya sa upat ka sundalo ug pugos nga gidala sa munisipyo aron "pasurenderon."

Sa Negros Occidental, iligal nga gisulod ug giutingkay sa mga sundalo sa 94th IB ug paramilitar ang pito ka balay sa Sityo Cabagal, Barangay Buenavista, Himamaylan City niadtong Hunyo 7. Gipig-ot usab sa mga sundalo si Evelyn Manait, myembro sa Ituman-Bukidnon, sa Barangay Amontay, Binalbagan niadtong Hunyo 13.

Niadtong unang semana sa Hunyo, "gibisita" sa mga pwersa sa estado silang Mafel Macalanda ug Lina Ladino, mga lider-katutubo sa Cagayan Valley, sa ilang mga balay sa Baguio City ug Cagayan aron hulgaon sila nga arestuhon. **AB**



Protesta kontra-henosidyo sa mga Palestino. Nagprotesta niadtong Hunyo 8 ang lain-laing grupo ug sektor sa embahada sa Israel sa Taguig City aron makmakon ang Zionistang estado sa nagpadayong henosidyo niini sa mga Palestino. Gidumdum nila ang ika-8 ka bulan, gikan Oktubre 7, 2023, sa pag-atake ug pagpamomba sa Israel, sa suporta sa US, sa Gaza. Sa rekord niadtong Hunyo 17, miabot na sa 37,347 ang gipatay sa Israel sa Gaza.

"Trespass rule" sa China sa WPS, gimakmak. Nagprotesta atubangan sa konsulado sa China sa Makati City ang mga mangingisda ug uban pang demokratikong organisasyon niadtong Hunyo 14 aron ipanawagan ang pagtangtang sa "trespass rule" o hulgang pagdakop sa China sa mga "langyawng" mosulod sa "teritoryo" niini sa South China Sea. Gipahamtang kini sa Chinese Coast Guard gikan Hunyo 15. Matud sa mando, idetine sa China ang mga maaresto gikan 30 hangtud 60 ka adlaw.

Karaban batok sa dagkung mina sa Benguet. Gatasan ka mga residente sa Itogon, Benguet ang nagkaraban niadtong Hunyo 13 padulong sa Benguet Provincial Capitol aron iduso ang pagpahunong sa pagpalapad sa dagkung kumpanya sa mina nga Itogon-Suyoc Resources, Inc. ug Benguet Corporation, Inc.

Protesta kontra-demolisyon sa Quezon City ug Mandaue City. Naglunsad og protesta ang mga residente sa King Christian St sa Barangay Bagbag, Novaliches, Quezon City niadtong Hunyo 15 aron babagan ang demolisyon sa ilang komunidad. Nagprotesta usab niadtong Hunyo 14 ang mga kabus nga residente sulod sa Cebu International Convention Center batok sa planong demolisyon sa ilang kabalayan sa Mandaue City, Cebu.

Jeepney phaseout, paantus. Subling nagprotesta ang mga drayber ug opereytor sa dyip niadtong Hunyo 10, kadungan sa hulga sa LTFRB ug LTO nga pakusgon niini ang pagpangdakop sa mibyaheng mga dyip nga wala nagpahisakop sa pugos nga konsolidasyon. Nagprotesta sa Metro Manila ug Iloilo City ang gatasan ka mga drayber. Samtang, naglunsad og tulo ka adlaw nga hunong-pasada ang Manibela niadtong Hunyo 10 hangtud Hunyo 12. Nagmartsa niadtong Hunyo 7 padulong sa Mendiola ang mga myembro sa Piston isip pagsaulog sa ika-43 anibersaryo sa pederasyon. Giduso nila sa rehimeng Marcos nga ibasura ang PUVMP nga mipatay sa ilang panginabuhian.